

Қўшиқ



17:57 / 07.07.2017 7266

1265. *Ибн Аббосдан ривоят қилинади:*

«У зот азза ва жалланинг «Одамлардан беҳуда сўзни сотиб оладиганлари бор» деган қавли ҳақида «Қўшиқ ва шунга ўхшаш нарсалар», деди».

Шарҳ: Улуғ саҳобий Абдуллоҳ ибн Аббос Луқмон сурасидаги мазкур оятни тиловат қилиб туриб: «Бу ердаги беҳуда нарсалар қўшиқ ва шунга ўхшаган нарсалардир», дебдилар.

Бу мавзу аввал ўтган ҳадислар шарҳида батафсил ёритилган.

1266. *Баро ибн Озибдан ривоят қилинади:*

«Расулуллоҳ соллаллоҳу алайҳи васаллам: «Саломни ёйинглар, саломат бўласизлар. Ашара ёмондир», дедилар».

Абу Муовия: «Ашара – беҳуда нарса», деди.

Шарҳ: Бу ҳадиси шариф ҳам аввал ўтган ва шарҳ қилинган.

1267. *Фазола ибн Убайддан ривоят қилинади:*

«У одамлар тўпланган жойлардан бирида эди. Унга бир қавмларнинг куба ўйнаётганлиги етди. Шунда у ғазабланиб, ўрнидан турди ва ундан шиддат-ла қайтарди. Сўнг:

«Мана шунинг ютуғини ейиш учун ўйновчи чўққанинг гўштини еган ва қон билан таҳорат қилганга баравар», деди».

Куба – нард дегани».

Шарҳ: Мулоҳаза қиладиган бўлсак, ўша вақтда нард билан қимор ўйнаш кўпроқ тарқалганга ўхшайди. Чунки қимор бобида келган ривоятларнинг кўпи айнан нард ҳақидадир.

Фазола ибн Убайднинг қилган ишлари барчамизга ибратдир. Демак, жамиятдаги гапи ўтадиган кишилар бу ривоятдаги каби номаъқулчиликни ўзларига эп кўрган жоҳилларни бу мункар ишларидан қайтариб, қилаётган ишларининг қабоҳатини баён қилиб туришлари зарур экан. Агар шундай қилинмаса, қимор ва шунга ўхшаш зарарли ишлар жамиятда тарқалиб бораверади.

Шайх Муҳаммад Содиқ Муҳаммад Юсуф

(Одоблар ҳазинаси китобидан)